

**Kræftimik napparsimasut nappaatip paasineraniit suliaritinnissamut utaqqinerup sivilunerpaaffilerneqarnissaannik qulakkeerinninnissamik Naalakkersuisut sulissuteqaqqullugit Inatsisartut aalajangiiffigisassaattut siunnersuut**  
(Inatsisartunut ilaasortaq Aleqa Hammond, Siumut)

**Akissuteqaat**

(Peqqissutimut Naalakkersuisoq Agathe Fountain)

**Siullermeerneqarnera**

Naalakkersuisut nunatsinni kræftimik nappaatit siusissukkut paasineqartarnissaasa katsorsarneqartarnissaasalu pingaaruteqassusiat eqqumaffigeqqissaarpaat, siunnersuummilu sanngiinnerusortatta napparsimasortattalu ajunnginnerpaamik isumassorneqartarnissaannik eqqarsaataasut isumaqatigalugit.

Kræfti (canceri) nappaataavoq timip ipiutaasaasa aalajangersimasut allanngornerisigut nakkutigineqarsinnaanngitsumik timip ilaani aalajangersimasuni imaluunniit aak timillu imertaata aqqutai aqqutigalugit siaruaalluni aallartittartoq. Nunatsinni Nakorsaaneqarfiup ukiumoortumik nalunaarutaani 2007-imeersumi takuneqarsinnaavoq nunatsinni kræfteqalersartut amerliartortutut isikkoqartut, tassami ukiut qulit siornatigut 147-usimariarlutik 2004-mi kræftertut paasineqartut 213-inngorsimammata.

Kræftimik nappaatinik misissuisarneq katsorsaasarnerlu ataatsimut isigalugit Danmarkimisulli tunaartarisassaqaarluni maani ingerlasarput. Tamatumani pineqarput kræfteqarnerit nunatsinni suussusersineqartartut katsorsarneqartartullu kræfteqarnerillu nunatsinniunngitsoq katsorsarneqartariaqartartut. Iviangikkut, puakkut inaluarsuakkullu kræfteqarnerit nunatsinni ullumikkut misissugarineqarlutillu katsorsarneqartarput. Kræftimik katsorsaanerit nunatsinni teknikikkut periarfissanik qaangiisut, soorlu qinnguartaalluni katsorsaanerit, ajornakusoortunik pilattaanerit katsorsaanerillu ajornakusoortut allat Rigshospitalimi suliarineqakkajunnerusarput.

Kræfti nunatsinni peqqinnissaqarfimmi nappaatit inuunermik ulorianartorsiortitsisutut nukiuguttarialittut isigineqarpoq, ullumikkullumi kræfteqartoqarneranik peqqinnissaqarfimmi pasitsaassisoqartillugu misissortinnissamut utaqqisoqartanngilaq. Pasitsaassisoqartillugu napparsimasut misissugassanngorlugit Dronning Ingridip Napparsimmavissuanut innersuunneqartarput. Taamaammat kræfteqartoqarneranik pasitsaassinermit nappaatip paasineqarnissaanut ingerlaaseq nunatsinni Danmarkimiit sivilunerusanngilaq.

Naalakkersuisut kræftimik nappaatit suliniuteqarfissatut pingaarutilittut isigaat qulakkeerineqataarusussuseqaarlutillu kræftimik nappaatillit sapinngisamik pitsaanerpaamik katsorsarneqartarnissaannut.

Taamaakkaluartoq Naalakkersuisut siunnersuut akuerineqassanngitsoq inassutigaat, tassami siunnersuutigineqartutut qulakkeerinninnissamut pisariaqartitsinerup aalajangersarneqarnissaanut taamaallaat periarfissaqassammat napparsimasut kræftimik nappaatillit misissorneqarnissaannik katsorsarneqarnissaannillu ataatsimut naliliisarluni misissuinikkut.

Aalajangiiffigisassatut apeqqummut UKA 2009/18-imut akissummi takuneqarsinnaasutut Naalakkersuisut suleqataarusupput suleqatigiissitamik pilersitsisoqarnissaanut, maannakkut kræfteqartunik paasiniaasarnermut katsorsaasarnermullu, kræfteqarnermut tunngasuni allanngoriartornermik nakkutilliinerup pitsanngorsarnissaanut periarfissanut, aamma kræftimik nappaatillit ingerlaatsimik ataqatigiissutut iluaqutaasutullu paasinnittarnerannut tunngasunik nassuiaasiortussamik. Taamatut sulineq Peqqissutsimut Naalakkersuisoqarfimmi ingerlassaaq. Oqaatigineqassaaq naalakkersuisoqarfik suliaasaajunnartunut naliliisarluni misissuinikkut kaammattuutit kingunerisaannut aningaasaliissutinut killiliussat iluanni aningaasaliissutissanik nassaarniarnissamat pisussaaffiligaassanngimmat.